

BOETAPELE BA GLOBAL SOUTH BA HO FIHLELLA KENYELLETSO YA BOHLE MESEBETSING YA TIKOLOHO YA TLHAHO YA DIBAKA TSE TJHESANG EBILE DI LE MONGOBO HAMMOHO LE PABALLO YA TSONA

Mantswe a sehlooho

Tekatekano, mefuta e sa tshwaneng, kakaretso ya bohle, bakgathatema ba selehae, ditshebedisano tsa matjhaba.

Mohopolo

Ho matlafatsa bonkakarolo ba bafuputsi ba Global South mesebetsing ya tikoloho ya tlhaho ya dibaka tse tjhesang ebile di le mongobo le paballo ya tsona ke sepheo sa sehlopha sa rona sa boramahlale, empa ditshisinyo tsa ho ntlafatsa kenyetsetso ya bohle di lebisitswe haholoholo ditheong le bafuputsing ba Global North. Ke nnete hore dintlafatso tsena ke tsa bohlokwa, empa ho na le diphephetso tse ikgethang tsa ho se tshwane ha mefuta, tekatekano le kenyetsetso ya bohle (DEI) kahara Global South tse bakwang ke maemo a setjhaba le a moruo, a setso le a tsebo ya mahlale. Kahoo, diphetoho tse simolohang Global South di bohlokwa bakeng sa diphetoho tsa moshwelella tsa DEI, tse netefatsang hore patlisiso ya tikoloho ya tlhaho ya dibaka tse mongobo le tse tjhesang hammoho le ya paballo ya tsona e sebetsana le mathata a teng hona jwale ao mefuta e sa tshwaneng ya dintho tse phelang e tobaneng le wona. Re sisinya mehato e leshome ya bohlokwa e tla netefatsa tshebedisano e lekalekanang ya matjhaba tikolohong ya dintho tse phelang dibakeng tse mongobo le tse tjhesang, e etelletseng pele ke bafuputsi ba Global South, e ka ntlafatsang DEI mekgatlong, kahara naha le dinaheng tsa matjhaba. Mekgatlong, re kgothalletsa (1) ho ba mehlala e ka latelwang ya DEI, (2) ho qala patlisiso mmoho le bakgathatema ba selehae, le (3) ho kgothalletsa tsamaiso e hlakileng ya tshehetso ya ditjhelete molemong wa boramahlale ba selehae. Kahara naha, re kgothalletsa (4) ho kenella mehatong ya sepolotiki e sireletsang boramahlale le patlisiso ya bona dinaheng tse mongobo le tse tjhesang, (5) ho nka karolo maanong a patlisiso ya mefuta e sa tshwaneng ya dintho tse phelang, le (6) ho rala patlisiso e fihlellang setjhabeng. Dinaheng tsa matjhaba, re kgothalletsa bafuputsi ba Global South ba amehang ditshebedisanong tsa matjhaba ho (7) etella pele le ho tsamaisa dikopo tsa tshehetso ya ditjhelete, (8) ho netefatsa hore mosebetsi o jarwa ka ho lekana, le (9) ho buella melemo e lekanang ho ba sebedisanang kahara naha le dinaheng tse ding. Qetellong, (10) re sisinya hore boetapele ba Global South bo sebetsang lefatsheng lohle bo na le monyetla wa ho ntlafatsa DEI lefatsheng lohle, e leng seo ruri se ka tlisang diphetoho tsa moshwelella hara boramahlale ba rona. Dingolwa tsa tlatsetso di hlahisa ditaba tsena tse ngotsweng ka dipuo tse ding tse buuwang dibakeng tsa Global South.